

家私館譜

卷一至四



亭詩卷

秋鈔

館十

仲護署



刊月壬
於臘子
京八嘉
師日平

序

錢塘許緣仲方伯之夫人顧氏先母鄭太夫人之中表姊妹也方伯之從弟子原觀察與余同游邑庠又與先叔同登癸酉鄉薦故許氏之家世惟余最悉及余通籍而觀察方官比部旋入諫垣文字遇從殆無虛日嘗聞其兩女弟之才其長歸嘉定廖仲山宗伯早卒會遭兵燹詩句多不傳次卽今貴陽陳尙書筱石同年之淑配世所稱亭秋夫人者是也觀察居吾師俞曲園先生甥館先生女公子絳裳女史爲夫人媵氏工詞翰夫人幼從之學故才思雋上尙書又與余同領鄉薦登第後並

在京師每於兩家獲誦夫人得意諸作然珠玉亦不輕出且不甚存稿自尙書由京兆尹開藩汴中督漕袁浦以至撫吳撫汴移蜀督鄂南轅北轍繡駟隨之江山湖海之勝盡歸眼底神仙花草之瑞時集庭中尙書既有一官一集之編夫人亦隨地吟哦積如千卷會尙書保釐畿輔余抽簪後仍居宣南飈車迅速郵筒一口可達於是彼此迭有贈答兼以拙句求夫人題詠及上年避地津門尙書正引退僑居望衡往還益密因得拜觀夫人全集盥讀旣竟不禁起而歎曰夫人之詩詞豈尋常巾幗儷紅妃白嘲風詠露之句哉使以鬚眉論固忠孝

兼全之純儒義憤勃發之豪傑體恤民艱之廉吏慈惠
及物之仁人洞悉世變之智者悟徹上下之仙佛也聞
庚子聯軍入城尙書與夫人皆欲捐軀報國後吾師李
文忠公與尙書籌定欵局中外獲安其閒夫人贊助之
策實多觀集中聞

兩宮蒙塵慨然有作聞

二聖升遐有作忠肝義膽露於字裏行閒其初度日答
尙書韻云紅閨忠烈慚無補與鯁直忠懷誰識我諸句
可以知其志矣平時孝事其親固無待言及歸尙書深
以不逮事姑慈爲憾祭先之日必有詩誌感於生母李

太夫人忌日亦然知夫人孺慕之忱固數十年如一日也若夫時局日非當世營營利祿者方樂之不疲以爭趨捷徑夫人見而慨焉則有朝事無憑不忍聞列強洵洵窺中國但知鼓腹心中熱祇恐燃眉目下燒新舊異宜諸政改古制飄零事事新脂膏零落財愁盡貴賤無分苦共嘗諸作蓋當時在朝諸公所不敢言者而夫人獨言之至檐帷所到之地屏卻供億鋪陳均用其自攜者其曲體民情可謂周洽旁皇矣若汴中鄂中禱雨輒應并祝以分潤京師甘涼見僕人折巨枝梅花怒焉傷之仁心仁術隨在流露誦焚香清夜祝年豐之詩與慨

蒼生凍餒營謀利之詞可知夫人胸襟固有民胞物與之量也非直此也周丁兩夫人之後每有祀事必寄之於詩至再至三且爲卜地西湖右台山奉兩夫人靈輻自黔安窆躬爲料量窀穸其風義之高於此見亦仁厚之德於此昭也迨滄桑世變之乘夫人又若前知觀詩中云最惜江漢城財窘民時閔又云人情反覆船遭浪國帑漸傾民意亂國事摧殘慚莫補民氣凋殘生意盡皆洞若觀火料事幾先若夫去來悟徹蓋有夙根當尙書在官時處極盛之境屢屬引退觀詩云勿戀權樞貴宦途須撒手豈若卻朝簪煙水清波共重擔一肩何日

歇清波煙水作閒人買山未允愁生黛眼前富貴等浮
雲茫茫宦海回頭岸整備歸裝早著篙與老境渾如出
世人諸句其見道之深直合儒宗仙佛爲一貫是以尙
書竟能急流勇退逍遙於晝錦綠野之間皆夫人力也
夫尙書檠戟式臨與夫人聯吟疊和時而仙蝶下翔花
瑞踵見似與政治無涉而休養元氣要寓其中試觀尙
書在鄂而洞庭不波笛聲月色皆助吟料是何等清曠
之境去未逾時而煙塵四起卽在北門筦鑰之際國勢
已日岌岌雖蓋籌擘畫心力交瘁而卒獲乂安解組不
一月丁沽之炬光燄燭天然後知尙書與夫人之福澤

皆寄意於文字之中其爲詩也正其造福有餘而始能爲之也世有胸無一字竭蹶不遑謬語人云吾將實事求是屑舞弄文墨卒至叢脞顛越并以辱國喪身其亦知尙書與夫人詩詞之功用爲何如哉夫人以掌珠之失集中哀女詩較多或有議其用情之太過者余則謂不然經不云乎喜怒哀樂之未發謂之中發而皆中節謂之和夫人之哀女發而中節之哀正所謂和也儻於愛女之隕而強作達觀不形於色不見乎詞此矯揉造作不近人情者是僞爲也其所謂中節者安在哉況三百篇之風詠勞人思婦之詞居多先聖刪詩不廢閨

閣幽怨之什固甚重乎才媛矣夫人諸鉅製猶是三百篇之旨而進合乎中和之道者也惟其中故立言不卑不亢論世不激不隨而悉叶乎正惟其和故雖嗟悼之詠而吐屬華貴風姿掩映令人誦之無衰颯之氣然則其和也皆其福緒之所融會者也昔人以温和二字銘郭汾陽之琴謂温字足以狀其大富貴和字足以形其亦壽考今夫人得其和故與尙書鴻案相莊笄珈偕老親見尙書之貴顯功成身退得嘯歌於偕園花竹之間而有酬唱集之刻則不言温而和之中已兼富貴壽考之福矣况温柔敦厚温厚和平皆詩教也吾以和論而

夫人詩中固隱寓溫之德矣至於琢句之妙美不勝收
大半寢饋於三唐而兼有蘇陸之蘊倚聲則瓣香漱玉
而合屯田白石碧山草窗諸家爲一手詩中佳句如數
點青山半夕陽日落寒礎起暮涼梧桐葉落秋聲老金
粟香添涼意生萬山亂疊雲如絮染霜紅葉已深秋風
凝凍地催征馬春暖煙波轉錦帆滿江漁火客愁中風
吹細雨滿江城催轉江頭遷客情沿江山色捲簾看山
色斜陽一片紅雪滿窗前獨倚樓滿山紅葉正深秋攜
得山中佳色來青山紅樹滿江村不對花豪對酒豪皆
深得唐賢三昧至題拙集云山缺似聞雲裏笛菴深靜

對佛前燈西樓日隱霞生赤南浦江流浪捲青病起看
花還策杖睡來枕絮欲眠雲寫閒居風景尤爲惟妙惟
肖若最好沿隄官柳外欹斜兩樹紫藤花踏徧溼雲雙
屐滑拾來紅葉一肩忙折得名花隨意戴臨窗獨坐寫
丹青皆詩中有畫不食人間煙火至於詞句輕倩由於
慧業過人雕琢刻畫之迹均洗而空之如薄薄紗襯夜
靜涼時候咫尺天涯淒涼兩地皆秋此與清照何異若
凭徧篷窗愁生山色溟濛與窗竹晚蕭蕭柳外月初生
諸句則逼真淮海矣若奈安邊少計鬢角愁生則直接
白石矣紅燭光分綠窗夢醒銀河宛轉微明則儼然草

窗矣青燈一縷殘煙盡乍朦朧睡也無多百結柔情詠
來萬緒千頭置之碧山集中幾欲奪幟矣若與尙書聯
句金和玉節更不勝枚舉如江靜輕雲澹天高落照遲
綠垂春漸老紅溼雨初晴面面青山環郭外村村黃葉
是江南蒼茫暮色風初定自在行雲水欲流藻采工麗
聲情侷儻幾於無可伯仲余姑舉一二以告世之讀斯
集者庶知以詩句論夫人則夫人之詩固騷壇之巨擘
以詩境驗夫人則夫人又忠臣義士純儒廉吏仙佛之
現身也昨者恭刻先母鄭太夫人都梁香閣遺集曾荷
尙書與夫人賜題今夫人大集告成雖先母未及見琪

何可已於言哉尙書之詩集余已爲文弁其簡端今更爲此篇質之尙書當以余爲知言也壬子夏六月荷花生日前四日姻世年愚姪徐琪謹序於宣南接葉亭時年六十有四

皇玉南登去暮四夏餘故有
綠垂春溢去珠盈前
口金味玉消更不無
本清餘千順爲之夢
齒笑青銀一紙數

序

漢儒之釋詩曰詩者持也謂持其志而不去也古之賢哲慮風趨之日薄作爲詠歌以道其性情而敦其風誼自漢以降沿及閨闈頌菊銘椒清才輩出國朝文教昌明有方召之勳臣宣力於外有尹吉之女士播芬於內以珍禕懿鑠之行寫女師德象之篇和其聲以鳴

國家之盛如內姑母許夫人之詩誠不可及矣夫人高陽名族夙有敦詩說禮之稱內姑丈庸菴督部夫子敷歷所至勳伐爛然而夫人襟懷之遠識鑒之精忠讜之

忱仁慈之惠自名卿大夫以逮鄉閭戚郤靡不交口誦
之其餘事復工詩詞卷中憶女之作爲多悱惻纏綿長
言詠歎昔賢所謂情文相生者讀之令人增人倫之重
而流連景物唱和同聲之什亦具此編戚黨見之咸歛
手欽服請壽諸劄陞雲受而讀之謹識數語於簡端
夫人珍禕懿鑠之行久布遐邇無藉詩傳卽以詩論所
謂道性情而敦風誼者誠有合於古賢持志之義以矜
式來茲其裨益於薄俗人心者遠矣內姪壻俞陞雲謹
序

序

仲護主人天資開敏髫齡未嘗學問而識解異於常人年三十來歸余適官兵部家政無大小恒相贊助庚子之變同居京師槍彈林中不失常度余奉

旨留守每有商榷無不動中機宜亦天資使然也偶有暇輒挑燈煮茗賡和爲樂然亦不多作迨余撫大梁乙巳六月吾女之喪無可排遣余有哭女詩五十首仲護亦成哀詩三十六首不忍卒讀嗣後西泠感逝橫橋望遠情所難遣一託諸詩今夏隨任武昌偶檢行篋已得存詩四百餘首是皆芳情之醞釀血淚之謳吟也爰謀

授之梓人仲護以素昧詩律深以貽笑方家為懼余謂
詩無工拙惟其真耳明月在天春花弄影此豈有雕琢
於其間哉描寫性靈發摠悲憤則是編也謂之詩也可
謂之言志也亦可是為序筱石陳夔龍

管閣容神育商琳燕不龜中靜直天資助然也同育
之變同風京祝餘林申不夫常與象第
平三十來禮余戲官其流寒新燕夫小語
林驚主人天資開燈尋儲未嘗學問而編緝異於常人

自

題辭

貴陽尚書同年以淑配亭秋夫人大集見示欽佩

不已敬題八律奉正

仁和徐琪 花農

鴻案吟來字字工瑤琴錦瑟答絲桐識超富貴功名外

福在神仙眷屬中喜佐調梅知有日非徒詠絮說因風

一篇秋興何堪比雙管花添萬朶紅

龍跳虎卧氣盤旋

公手書雄渾有虎卧龍跳之妙

妙體簪花格更妍

姻世

年伯母細楷工妙不讓古之簪花格也

偶現全身來世上早留愛女在天

邊靈蹤來往原無迹夢境分明豈化煙我有玉真慈母

感白雲遇處悟仙緣

多少仙才併一身 翛然吐屬絕纖塵 雲鬟對鏡偏憂國

庚子 兩宮西狩悲 鐵榦憐香出至仁 見折巨枝梅花者賦詩惜之

不沒前徽尋片壤 為周丁兩夫人營葬 賦詩誌感仁至義盡 常將時食薦雙

親 時至法相祠堂並有 李太淑人生日作 豈徒掌上珠 多淚忠孝由來發

性真 何來字字工 蘇琴鶴瑟各終賦 賦富貴也

愛女時從夢裏逢 文窗猶復露真容 江間帆影舟安穩

簾角眉痕黛淺濃 道服未攜青箬笠 仙居早擁碧芙蓉

右台不是尋常地 女公子葬 右台山 已到蓬萊第一重 不施

高樓黃鶴接金閭 汴水淮流共瀾茫 仙蜨飛來尊有酒

仙螻屢見有並蒂蓮蕙好花齊放蒂同芳六時身有雲

多至數十者之瑞疊見霞護萬卷家傳翰墨香休自撝謙說初學第一卷為直

推巨擘在錢塘

民隱都關念慮縈天心隨處默通誠甘霖應禱疇霑足

鄂中久旱不雨五月十八日默禱後春水奔流棹暢行

忽得暢雨即時前發鶴聽偶傳佳句出樵歸時問好山

名山居詩尤多又燭花開處知仙兆女公子生日設祭

李莫聽東風杜宇聲燭花結實大如桃

丁卯年登丁卯橋已聞法曲奏層霄同治丁卯琪年十

與姻世年伯母令兄子原觀察九回杭應童子試並掇芹香嘗因觀察得讀佳什排雲眼底窺全豹垂露

毫顛忝續貂自昔天孫工織錦由來秦女解吹簫鋪張

不事甘儒素姻世年伯母生朝屏除內助先將玉鼎調

志多慷慨意纏緜鴻案相莊句更聯與尚書聯句最多天女散

花憑說法相侯煨芋解參禪園名藏海三山近節署有藏海園

尚書所題也月過中秋十倍圓儷輿於中秋後始抵津門我愧浣花賦秋

興卻勞彩管寫吟箋時承題拙作三似吟

恭讀借園大集步古稀賜詩原韻奉題二首

長沙龔鎮湘省吾

絕妙佳詞絹寫黃醅醪如飲九霞觴思親自著天香草

題句時開畫錦堂三省觀風光彩筆八方紀瑞富珠囊

情深最是含真集題詠仙蹤意更長

慈竹欣隨使節來桂樓風景勝蘇臺雅音不減唐人韻
房樂能將楚俗培舉案芳型嗣梁孟和羹佳兆協鹽梅
溫柔敦厚倡詩教誦讀應當日百回

恭讀亭秋館詩鈔謹題二律以誌欽仰

山陰周和鼐

調之

開編字字皆珠玉想見名門令範貽直以兩閒清淑氣
蔚爲一代性靈詩和羹善助尙書績詠絮愴懷愛女詞
豈但宣文家學擅至情卓識亦吾師

二南半是天倫語小雅兼多時事憂鳳管雙聲諧律呂

集中多與貴陽師
聯吟賡和之作麟經大旨括春秋
集中有春朝曲
秋調歌二篇從

知蘭芷清芬播悉本蘋蘩內治修如此才華如此貴金

閨當代孰堪傳

謹題亭秋館集錄呈訓正

丹徒包安保
袖斧

獨得西湖韻花從筆上生佛仙參夙慧兒女獨鍾情巾
幘鬚眉勝清才豔福并夫人吟大雅樓閣月光明

恭讀師母許夫人大集謹賦五律二章以誌欽仰

貴筑嚴儼
晴初

清得乾坤氣江花筆底生雙聲詞譜出
集中與尙書一
聯句最多

品集哀成憂國形歌詠思親見性情滿腔忠與孝聊借
作詩鳴

尙書資內助十載領封疆 國事恆多感艱難已備嘗
雪鴻歸卷軸風鶴慨滄桑怕讀山中句羨闡意更傷

題辭二

貴陽尚書同年又以淑配亭秋夫人近作寄示欽

佩之餘更題二律

仁和徐

琪 花農

純臣抱負大儒心卻現雲鬢對玉簪絕代聰明前世具

憂時感慨與年深

姻世年伯母書感四首憂時憤俗情現乎詞真純臣心迹大儒梗概也

經綸偶露裁花竹酬唱相諧對瑟琴笑我山窗三似句

也煩法曲譜新吟

承賜題拙作三似吟今刻集中

頻年俗耳得鍼砭好句尤欣歲歲添滿院花香籠茗椀

沿江山色撲珠簾久思偕隱臨橋許

尚書於杭城裏橫河橋築室名曰借

園集中有上梁誌喜詩

早薄時妝倚鏡奩翊贊中興元老助全憑

雪絮佐梅鹽

東坡先生詩集卷之四

雪絮去曲盡

蘇軾詩集卷之四

寒朝忽晴

蘇軾詩集卷之四

醉臥醉負火

剛之繪夏

二麻翁

貴氣尚舊

詩一

題辭三

述懷用仲妹初度感懷韻

仁和許祐身

子原

秋來溽暑未全清
聊寫羈懷託管城
心怯湍流慚擊楫
年過耆艾漫稱觥
閒居潘岳惟安拙
抱病嵇康累養生
自是

聖朝隆選舉
明揚何以達公卿

舊游回憶玉河濱
姻婭相依閱幾春
畫省分曹頻草檄
蘭臺封事達
楓宸一麾出手漂
搖感十載長安法政
新籬鷓鴣低飛何足道
不妨隨處寄吟身

征帆纔卸駐南昌又整輕裝飭紀綱西望廬峰思蠟屐
東來鄂渚泛沙棠庾樓話舊搖紅燭謝墅聯吟付錦囊
容易秋風起天末蒹鱸那不劇思鄉

玉音昨自楚江傳爲說靈奇閩苑仙鏡裏曇花神若卽
樓頭蘧蜨夢初圓蘭階已兆宜男瑞筠管長留憶女篇
回首聯牀風雨夜相看華髮近衰年

臨別口占次亭秋仲妹韻

椒銘芍頌早傳揚鮑左清芬足抗行覲面仁驚容色悴
關心不覺客程長對牀聽雨憐多病異地看雲勸返鄉
何事相逢復相別離情長繫抱冰堂

今來下榻楚江濱去歲銜杯吳苑春猶憶宣南同卜宅
遙瞻斗北近依宸雪泥鴻爪星霜換玉纛牙旗氣象
新獨我風塵嗟擾擾幾時雲水乞閒身

梧岡鳴鳳應歸昌南紀風行網在綱道韞才名工柳絮
元瑜書記頌甘棠洗塵樽酒留三日贈別詩篇載一囊
適館授餐情意厚渾忘作客滯他鄉

仲妹寄示元旦和章因次原韻並題亭秋館詩鈔
春花秋月本天然彩筆拈來分外妍千里江山懷木末
一編冰雪展燈前含眞圖罷留題句望遠人歸索和篇
苦勸阿兄歸故里明湖垂柳已飛緜

恭和姑母大人重九日見仙蝶詩謹依原韻錄請

慈誨

仁和許綏之季履

風風雨雨紉蘭堂欲倚欄干過砌旁勁節傲霜性高介

院有盆菊

羽衣凝雪態輕揚

蝶色金黃比之以金雪

綺仙不食人間火

金粟如聞天外香

時桂花猶香

為報江南春信早依稀鶴舞

與鸞翔

題辭四 閨秀

紅閨獨坐鎮日無聊敬賦奉懷恭呈誨政

姪女之引 抱珠

蓮漏聽殘意似煎回思別況不成眠背人時灑懷鄉淚
腸斷天涯若箇憐

更憶髫齡嬉戲年嬌癡左右每隨肩關河迢遞音塵隔
惟盼紅鱗錦字傳

外祖姑母大人出示詩詞謝庭詠絮惆悵含真長
樂聞鐘繫懷京國忠愛悱惻之意悉見詠歌欽服
之餘謹題四律兼以送別

德清俞 璉 佩瑗

愛澤長淮更大吳
珠幢繡幟慰來蘇
纏繇忠悃懷金
闕俊逸文心鑑玉壺
芝誥雲霄銜彩鳳
蘭舟煙水訪
蓴鱸應知餘事工
詞翰模範名山入畫圖

林下風標數大家
不矜黻佩屏鉛華
毫端清聚湖山秀
心迹空依佛座花
香絮著衣懷謝女
新詩代柬答秦嘉
一編漱玉傳佳詠
豈獨賢聲眾母誇

娟娟黃竹隕嚴霜
倚枕清宵昔夢涼
自送仙姝歸絳闕
遂教阿母謝青囊
沈檀薰像經年憶
翠帶牽愁踈地長
誰與傳言切利去
一杯沆瀣遞瓊漿

慈雲兩載覆金閭
時屏鳴騶過草堂
春水蘭橈尋勝蹟

清談茗椀每斜陽不嫌翦韭盤殮薄祇覺論詩逸興長
行卷留題兼話別惱人柳色黯河梁

和姑母大人留別原韻

姪女許之仙 仙娜

憶昔金閨駐節年追隨慈座倍相憐高堂舊雨欣聯袂
弱女吟壇願執鞭片月俄將歸棹去三吳猶頌上官賢
茱萸插鬢重陽候怕唱驪歌第一篇

恩如愛日令秋霜早有賢名布遠方繡服已看天寵
錫荆釵仍是舊時妝錦箋疊韻聯風雅玉案齊眉祝壽
昌盼得從游湖畔路蘇隄佳處聽鶯簧

君姑大人賜讀雪窗感時作散步元韻勉成一律

子婦姚巽 伯婧

物換星移又一春花非六出也超塵數枝梅萼催詩興
幾處烽煙苦萬民國病奈無醫藥治家清自有謫仙因

問安切盼雲駟至再向庭闈啟絳脣

謂先姊舍
真仙蹟事

並蒂蘭獻瑞賦此呈君姑大人慈誨

楚畹纖纖第一香素枝並影自芬芳移來幽谷清高品
開到華堂雅澹妝月下雙妍連理態風前相映合歡裳
頻年佳兆非無意知是瑤臺乞玉漿

戊申四月舟中敬步君姑大人韻

麥秋天氣赴征輶爲戀湖山敞綺寮好鳥枝頭嘯不住

牧童牛背自生驕書成鸞紙無佳句采得新茶試煮燒
月入篷窗明似晝漁樵一曲漫句挑

君舅大人壽辰前三日有翠螭二十餘飛繞桂樓
前君姑大人以詩記之敬步元韻

正是椿護綠蔭長兩行紅燭耀光芒料知此日斑衣舞
未減當年翠袖揚彩色飛時依畫閣天香深處薦霞觴
預爲慶祝緜緜意不遠曾傳慰北堂

自紋姊仙去後往
往化螭慰親靈蹟

真切已詳君姑稿內巽會夢姊
在雲霧中欲勸歸日好在不遠

君姑大人五秩晉一壽辰謹獻一律

紅燭雙輝裏和風愛日新樽開浮瀲灩花發頌長春蘭

蕙欣同蒂

常得並蒂蘭

椿護福並臻鏡中留異迹未失捧觴

人於攝影上見紋
姊真靈頗肖

不州當... 北是... 前... 人... 人... 人...

題辭五 閨秀

滿江紅

外祖姑母大人將返杭郡瀕行以大稿賜示莊誦

循環恭題二闕錄呈慈誨

德清俞 玫 佩珣

芍藥名篇數林下高風有幾况煙雲落紙江山都麗 詩餘

兼工繪事 漱玉詞宗閨彥奉飛瓊仙籍前生是負清才慧福

證雙修劉樊侶 金闕叩清虛地斑管寫纏絲意羨江

花夢醒全收腕底綺句都含慈母淚瓊章如誦金鑾記

稿中多含真憶女之事 玩斯篇端合付青鸞瑤京寄

其二

冰雪襟懷已早願鹿門遁迹看長安滄桑棋局杞憂徒
 切甯壽温綸邀寵問咸陽烽火曾親閱歎忠貞今竟屬
 蛾眉誇奇絕宗高潔志林泉癖豪邁性珠璣筆喜金荃
 新製許窺妙墨一片歸帆低雁影兩年吳市留鴻雪覺
 離觴未舉已消魂情難竭

醉豔恭頌二國綸呈慈翁

伏願故君大人凱丞林添贈仁以六蘇顯示其龍

滿五珠

風蒲正

開秀

亭秋館詩鈔卷一

錢塘許禧身仲護

初學集

月夜卽事

月漾簾波似水紋
酒闌歌罷覺微醺
羅幃乍展紗幪掩
還把沈檀細細焚

秋夜卽景

露井蟲吟夜色深
窗移花影月窺琴
清宵酒後難成寐
隔院風微送笛音

詠梅

疏影橫斜映夕陽湖風過處送幽香相依卻喜林中鶴
耐得嚴寒共晚芳

蘭

披飛澹影拂銀釭九畹移來供碧窗相對素心如解語
天然逸韻本無雙

竹

新秋庭院碧沈沈翠袖驚寒力不禁香燼煙銷簾未捲
萬竿涼影暮雲深

菊

生成傲骨本難求豈與凡枝作等儔歸去莫嫌三徑晚

猶留佳色占霜秋

冬日湖上卽事

西湖佳色雪中妍
飛絮平鋪薄暮天
漁子投綸波不動
茅廬深處起炊煙

春月

嫣紅姹紫鬪芳妍
春色宜人月上弦
卻喜嫦娥來解意
移將花影過窗前

月夜懷靜宜姝

寂寂簾籠隱隱燈
深宵宿鳥忽飛騰
思君懶看中庭月
千里應同玉宇澄

去秋相別近重陽今日回思情倍傷清夜月華明似水
蘭閨誰與話更長

畫樓西畔拍紅牙乍聽聲隨玉漏賒深夜愁多難入夢
縱橫桂影月初斜

乍見相投未易求羨君性格自溫柔依依數載情無限
爭奈陽關去不留

春雨懷絳裳媛

春深微雨暮時天柳色添陰澹澹煙滿目離愁收不起
惱聞隣院打鞦韆

夜深望月有懷絳裳媛

無端分手是初秋
一曲陽關不自由
記得夜深明月靜
藕花香處蕩輕舟

香盡煙消夜色闌
雲霄雁過月光寒
天街漏鼓沈沈寂
燈下家書幾度看

綠楊枝上又成陰
往事思量不可尋
記得金閨分手日
浪痕頻溼碧羅襟

蕭蕭落葉已秋寒
細雨廉纖獨倚欄
忽見雲天飛雁陣
煩他傳語報平安

月下海棠

輕紅淺白鬪芬芳
月下偏成絕世妝
花意也知人意澹

伴儂清夜聽更長

客舟

夢魂乍覺漏方長
閒倚篷窗情自傷
記得故園銷夏日
水晶簾下獨焚香

靜兄由汴寄詩次其韻

乍解征帆客路中
無端一別各西東
雁行聚首知何日
料得離愁處處同

酒後書懷

夕陽西下月將升
相對金樽感易增
醉後不堪懷舊事
一星螢火夜如燈

重陽夜作

東籬霜重菊初新，
悄倚雕闌月滿身。
試問諸兄當此夜，
登高可念遠遊人。

聽雨

一雨饒秋意，
簷聲送晚涼。
繡餘傾聽處，
琴韻答鄰牆。

對菊

瑟瑟西風深閉門，
月移花影伴黃昏。
劇憐佳色隨人澹，
斜倚秋窗一縷魂。

詠梅

獨占羣花首，
堪欣色更芳。
不愁風雨妬，
豈惹蜚蜂狂。
獨窗

外溶溶影爐中裊裊香疏枝斜印月永歲伴蘭房

燈花

團團彩色如華蓋隱隱霞光滿室紅但把深情隨夜月
不同桃李怨東風

一枝紅綻碧紗旁不與羣芳鬪豔妝每伴深宵青玉案
花光燈影兩輝煌

戊子冬日口占

膝下依依不解愁卅年荏苒住杭州無端一曲驪歌起
拋卻閨中舊綺樓

曉日微烘繡閣前丹青一卷獨流連金爐裊裊香煙起

嬌婢殷勤捧硯田
接索枯腸懶詠吟
繡闈閒暇度金鍼
夕陽無語將西下
何處寒風起暮砧

病體新瘳倦整鈿
輕霏玉屑小階前
愁中怕弄梅花笛
一曲清歌半不全

小病纏綿不耐風
重幃深處一燈紅
羅衾倦倚偏無夢
臘鼓頻催隔院東

望月有感與筱石聯句

月色淒清花影搖
夜深風過葉蕭蕭
亭秋雕闌屈曲凭

都徧玉鎖葳蕤夢
豈遙筱石紅燭燒殘人意懶
綠窗吟

罷客魂銷亭秋雁聲嘹唳雲端裏可為霜天慰寂寥筱

石

月下對飲

三五團圓月筱石清宵興倍豪花香馨滿坐亭秋酒綠

令分曹宦味浮雲澹筱石琴心流水高夜涼人不寐亭

秋乘醉一拈毫筱石

冬夜聯吟

夜闌人靜度良宵亭秋柏子初焚絳蠟燒屏掩猩紅香

隔座筱石杯傾螳綠壘同澆圍爐細話鄉園景亭秋欵

枕寒生渤海潮落月照窗詩思寂筱石簫聲一曲漏迢

迢亭秋

冬月有感聯句

更鼓頻催歲暮天夜深無事拂吟箋亭秋金爐鴨暖浮

香篆玉柱鴟寒試錦絃筱石侍婢殷勤烹活火亭秋浮

生無賴感華年筱石何時同泛歸來棹亭秋一憶西湖

一惘然筱石

庚子之難時居京師聞兩宮蒙塵感賦

翠華西幸萬民驚九國連雞逼帝京本欲捐軀猶未

決奈何女幼繫儂情

倉猝移家不擇棲小園寂寂草萋萋通宵聚坐愁君國

烽火連天月漸西

其時與筱石靜
兄紋女敘坐

顛沛流離一載中
光陰似電又秋風
蓴鱸雖動思歸念

惜別情懷兩意同

勸君珍重勉加餐
無限離情欲寫難
若慮深闈懷遠道

頻將魚雁報平安

議和不果筱石勸
余先回杭後未行

詠留園

飛香高閣入雲霄
一望雙旗拂拂飄
最喜太平風景好

輕敲畫鼓鬧元宵

高臺遠與柳隄平
滿院風涼百草生
最是花王高品格

不同凡卉鬪輕盈

紛紛細雨落庭階屋後春光麗小齋卻怕風姨多作惡

花幡親製早安排

荷芳書院屋後多花草兒輩以紅綠生絹作旗護之

清宴園卽事

輕風裊裊養花天春酒荷芳列綺筵對岸梅梢飛細雨
隔牆茅屋起炊煙

漁

春日融融春草香小橋隱約白雲鄉垂絲獨釣青溪石
舉網還拋碧水塘紅葉渡頭歸浣女綠楊隄畔隱漁郎
沽來美酒烏篷啟一曲高歌醉夕陽

樵

白蘋風起早秋涼
疊疊青嵐山路長
踏徧溼雲雙屐滑
拾來紅葉一肩忙
倦時且坐拳拳石
夢醒還看小小莊
高唱樵歌歸去晚
月明荷笠上高岡

耕

煮飯炊薪仗老妻
忽聞徧野曉雞啼
柴門初起兒攜鍤
麥隴同耕弟執犁
乞得甘霖春水足
望他秋日稻芒齊
官租完卻欣稱幸
醉訪鄰翁過小溪

讀

魏晉詞源到宋唐
古書滿架列成行
村居課讀疏籬短
山郭閒吟松徑長
彩筆漫題紅葉句
青藜緩步綠雲鄉

歸來明月當空照燈下揮毫詩興狂

敘兒

丰神皎潔玉亭亭氣質如蘭體自馨折得名花隨意戴
臨窗獨坐寫丹青

書懷

清游回憶興猶酣蘋末相思只滿潭未卜秋風何日轉
片帆送我到江南

並蒂蘭

幽香豈受俗塵侵幸遇高人挈伴尋不愧靈根生九畹
更欣雙蒂結同心名花對影因風舞秋月重光帶露臨

每到憩亭一眺望如將禊事續山陰

並蒂蓮

平明信步繞芳塘傍柳隨隄過曲廊湖比鴛鴦還共泛
亭開荷芰自相莊出塵不染雙心潔並影同看佳興長
我本愛花花對語頻將佳兆祝禎祥

題某夫人散花仙女回紋錦裏圖

縹緲峰頭第一仙香風飄拂起雲煙乞將大士楊枝露
沾漑清池朶朶蓮

紫陌紅塵駐錦車羽衣鶴氅映流霞汲來不老天泉水
徧灑人間並蒂花

茶竈丹鑪手自煎
感他靈藥可回天
欲酬扁鵲名醫意
妙格簪花細細填

筆端飛舞意玲瓏
百首新詩點染工
花榮宮詞蘇蕙錦
多輸團扇碧紗籠

亭秋館詩鈔卷一

風想此靈藥可回天
冷灑風歸台

(Faint bleed-through text from the reverse side of the page)

亭秋館詩鈔卷二

錢塘許禧身仲護

和淚吟

舊有哭女三十六絕已編列松壽堂詩鈔卷十借園集中茲不另錄

江輪悶坐千頭萬緒悲從中來勉吟五絕誌感悼

女

側坐棺前獨自論
長江風景伴黃昏
迴思十七年中事
珠淚盈衫盡血痕

堪歎癡心候汝臨
仍留半榻覆羅衾
宵來慰母猶依側
夢醒腸迴感不禁

終日慊慊眼倦開
短箋一幅手親裁
傷心怕看沿江景

幸得游魂入夜臺

計程將已抵吾杭失卻明珠最可傷去日苦多來日少

那愁兩鬢漸如霜

勸君珍重勉加餐似此愁腸欲寫難開到嶺梅歸去否

好憑驛使報平安

乙巳冬夜昭慶寺諷經作

一片彌陀起梵音孤燈風定漏沈沈淒涼古寺思兒苦

仰見雙親入夢尋

夜夢雙親醒時即接汴信述請封事

書懷

流水光陰屈指彈日長如歲勉加餐含愁欲寫胸中苦

手執尖毫下筆難

無聊心緒恨悠悠晨起昏昏懶舉眸忽覺香風依膝下

佳音和露降杭州

睡中覺蘭香濃重驚起忽接汴中調蘇之報吾知兒願父母團聚一方故

從中默佑得此更調也

甫抵蘇垣筱石出詩勉和元韻

乍見還疑夢凋零歎膝前屏除閨閣樂難卻鏡臺緣執
筆詩情湧攤箋淚滴漣回思山內徑月下獨迴旋

又

記得于歸日光陰在目前腰圍驚帶落鬢影歎霜連已
盡名場念還留舉案緣西泠春色好卽此錦衣旋

又

處此黃梁夢千戈恐目前愁多添病劇禍結苦兵連勿
戀權樞貴難忘翰墨緣歸山一漁棹風送片帆旋

和筱石韻

風逼嚴霜漸入寒千頭萬結解憂難為女料理葬務朝衣久戀

還愁重布褐隨身不覺單碌碌紅塵何日了茫茫仙路
那時安春回惟願歸來早暫解愁眉家慶團

由蘇旋杭舟中作

桑田青翠兩隄長月色如銀波不揚茅舍雞鳴驚曉夢

香風護送抵錢塘由蘇返杭舟中常聞降香蘭花等香想係吾兒沿途相依護送

凭徧蓬窗心黯傷一舟如葉布帆揚多情最是清宵月
伴我思兒聽漏長

仲秋入山爲兒營墓

玉碎珠沈已一年淒涼古樹墓門煙不堪此境何曾曉
明敏丰姿了我前

十七年來似夢中一棺安厝右台東迎來兩母當慈愛

定卜憐兒與我同

筱石前室周丁兩
夫人亦同葬右台

庸醫誤汝實堪傷切切思量那日償眼看青灰化蝴蝶
紛紛血淚泣枯楊

小病

時值中元月在天不知與汝幾時圓
幃前獨坐心頻禱
可有靈霄玉旨傳

冰簟紗幮夢不長
病中風雨惱人腸
青燈如豆明還滅

耳聽鴉鳴現曙光

右台營墓徹夜不眠惟盼鴉鳴則知黎明矣

不料宵來睡略安
思兒權作夢中看
窺窗明月微微亮
隔戶雞聲驚夢殘

山中悼女詞

舊稿別爲一卷茲與前詩合編

乙巳冬夢中卽事

十二年來不見親

次女故已十二年昨宵與姊同來

夢中隨姊定
昏晨

青絲低挽雙鬟結
仙髻雲裳恰稱身

夢兩女皆披鶴髻梳前髻

述懷

人身禍福本難量前事重思夢一場日照冰花安得久
霜棲枯樹豈能常紅塵碌碌何時了苦海茫茫那日償
願乞胡麻一鉢飯依兒同坐聽霓裳

憶女

昨朝聞汝侍重堂玉液瓊漿奉膝旁能否清宵通一夢

爲兒親手整仙裳

前得沐信夢兒
與生姑同居

長夏由吳返浙舟中不寐

兩鬢新添數點星何其膝下太零丁蓮花滴盡偏難睡
小婢垂頭倚畫屏

微微霽色現朝陽
畫舫輕舟過藕塘
遙望青天何縹緲

白雲深處隱仙鄉

結轡柔腸若亂絲
強扶病體獨操持
明朝青草祠堂去

再視橫棺痛不支

右台懷女

思量往事最心傷
膝下承歡孝意良
僕輩感恩時念主

淒淒痛淚泣墳堂

兒性最孝余偶有不適必日問數次而僕輩間或有過則恕而置之時已

一年伊等尙念及而泣

一縷清香掩女墳
滿山黃葉亂紛紛
杜鵑嘯血聲隨淚

紙帛淒涼燭自焚

右台安瑩時各親友皆聞有奇異之香紛紛撲鼻而來

四野雞聲初報明曉風殘月伴棺行惟思早了紅塵夢
何必還留鬱鬱生
獨坐山前黯自評枯枝日影亂縱橫此心久絕繁華念
願與兒曹返玉京
記得雙珠幼小時丰神如玉蕙蘭姿伶仃學步承歡日
斷盡迴腸寸寸思

數點青山半夕陽
風送行雲日漸冥遙觀山色四圍青心香一炷墳前禱
塵夢恩恩那日醒

世間幻景總難常何故催人太覺忙冷落庭闈淒寂處

病中湯藥遣誰嘗

遊魂昨夜入黃梁復見嬌兒倦倚牀

夢兒倦倚繡衾

天外歸鴻

驚曉夢淚痕點滴繡衾旁

咏蜨

雙翼含風青草香平分五彩色生光飄然飛過山前去

舞態蹁躑帶夕陽

時過霜降山前彩蜨日必數來其中以黃色居多

法相祠堂作

自覺年來力不支逼人事事總難辭回思幼小依親日

觸動柔腸似亂絲

銅壺滴盡一燈青
晨起開匳數卷經
老境無聊吾自曉
何人小步再趨庭

獨憶兒時學步成
丰姿如玉體晶瑩
不期竟被庸醫誤
此恨絲絲那日平

夜夢兩兒彩衣長袖笑侍膝前

偕妹珊瑚謁母來
彩衣長袖稱身裁
因思此夢原成幻
暫慰悲懷眉黛開

丙午初冬山中夜吟

一鉤新月露霜棱
雙桂祠堂寂寂燈
檢點平生經歷境
年來心緒已如冰

日坐山前伴汝靈視他村子伐樵青朔風撲面寒生骨

此際悲懷若慣經將近冬至獨坐山前視工旁侍惟男女僕耳

山色青青望眼中寒深空谷景微濛鷓鴣有淚嗁秋雨

白鶴梳翎傍老松江上芙蓉增色媚籬邊殘菊傲霜濃

雞聲驚破朝來夢鎮日生涯付轉蓬

有感

事如蝟集强支持無限悲傷十二時願禱天公歸我早

與兒同返碧蓮池

久雨不晴

緜緜春雨灑窗前心事渾如百沸煎自覺一身無大過

欲將此恨問蒼天

接汴電知調補蘇撫悼女有感

忽聞佳耗出金梁回憶前情反覺傷

女在惡汴中風
土日思回南膝

下凋零誰是伴淒淒風雨斷人腸

丰姿綽約貌凌波膝下承歡顏色和終日思兒腸百結

昏昏雙目淚痕多

記曾申浦繫扁舟半幅衾裯為汝留不料深宵聞友語

姪女仙娜夢女從
縹緲樓閣中來仙雲縹緲起樓頭

丙午初冬右台山營墓

最恨庸醫誤憐兒一病殤歛容卻塵世含笑整仙裳

几書函亂空閨繡榻荒昨宵風雨夜湯藥侍親嘗

冬至在山

營葬夜閒咳嗽甚夢女持藥一盞與余服次日即愈

長夜寒偏重年來疾病增冰凝窗下硯風弄案前燈舊
景恩恩過新愁脈脈仍噉聲難入夢權作坐禪僧

又

木落煙昏暮掩門淒涼景况黯銷魂髻年婉變隨親日

膝下依依態最溫

兒性最順無一事不隨余意

速我餘年卻自知日來悲悶半如癡此心久絕塵寰念

出語偏多酸苦詞

拈得尖毫萬念冰寒更聽盡對殘燈珠宮朶殿知何處

雲掩仙山那日登

野寺鳴鐘夜氣昏
飄飄風雪不生溫
擁衾和淚尋兒夢

佳節深山欲斷魂

連日雨雪交
霏見景思兒

傀儡場中西復東
傷懷幾度付詩筒
從今滴盡思兒淚
江水能窮淚不窮

憐他孝意總纏緜
況是分飛各一天
欲向空中覓仙蹟

畫圖展處獨潸然

含真仙蹟昔夢中仙境
也繪圖以誌女靈蹟

步盡長廊夜倚樓
月明更覺懶擡頭
從今檢點年來苦

最怕聽人說汴州

兒沒於汴梁節署偶聞
人說汴事不禁泫然矣

強支弱體展春風
每忍呻吟一笑中
尺幅含真重閱處

數行清淚溼枯桐兒病時余每詢其病體如何兒笑曰誰無小恙不日當可痊愈母勿憂也

悲腸都付數行詩黃絹青箱哭女詞膝下自憐零落甚

枕函淚血幾人知余詩大半憶女傷懷

南山營葬

卜得佳城錦繡峰孤山梅鶴鳳山鐘自思他日還堪慰

西子湖邊一墓封余自留生壙其中他日得與女相見聊自慰也

眼看村童奔走忙杖藜扶我過墳旁白雲衰草迷山閣

紅樹青山挂夕陽在右台營造墳墓余時到墳前流連野景監視工作每至夕陽西落始回

祠堂
休息

天外鸞車何日到鏡中鴉鬢已如霜疎鐘古寺驚塵夢

無限傷懷問彼蒼

丙午深秋南山祠堂

獨坐深山脊復晨
淚滢雙目共眉顰
卜來吉壤埋兒襯
留得佳城寄我身
紅葉數株迷野閣
青煙一縷隔城闌
夕陽澹澹將西下
老境渾如出世人

丙午冬月廿八日卽事

流光泡影一年過
血淚看看委逝波
謝絕兒時諸戚友

連朝閉戶念彌陀

兒生忌誦經三日
閉戶謝客

此身飄泊幾時安
冷落庭前暮鼓寒
和淚爲兒資冥福
茹齋三日設香壇

廿九日兒生辰在橫橋誦經三日

遠隔仙凡兩地牽光陰流水箭離弦今年霜冷西湖月
去歲靈歸兜率天

兒生辰日供燭結花大如桃李

雙結瓊枝紅玉華紗籠錦幔不須遮攜來仙島蕊雲蘂
幻作華堂慰母花瑞氣團團光閃彩輕煙裊裊色生霞
長空鶴唳香風過今日重停七寶車

臘月初五日夢兩女來依膝下

念兒一體本同根不料輕拋養育恩卻喜宵來還入夢
雙雙膝下定晨昏

月餘僻處在鄉村終日含悲對墓門到得宵來風雪至

蕭蕭落葉被難溫

時已仲冬山中萬木凋殘冰凝霜結寒氣逼人

山閣嚴寒曉復昏自知在世總難存鄰雞嘯處更籌寂

驚破淒涼夢女魂

夜夢兒如生承歡膝下鄰雞嘯處殘夢驚回淚滌衾枕矣

山中思女懷遠卽和筱石原韻

別後旬餘日深山草徑長眼觀亡女墓心念遠人裳睡

少容顏改愁多筆墨荒堪憐垂暮境紅葉恐經霜

因卻嚴寒暮掩門坐觀新月似眉痕深山萬籟風吹葉

傷盡淒涼思女魂

夢中卽事

夜靜長空月一輪強支病體獨馳神夢魂顛倒驚疑處

環珮珊珊笑侍親

是夜夢兒衣古裝含笑依膝下

自悼

此身潦倒已如塵病體添來舊與新今日山中先自誅
他時誅我是何人

世事隨風葉人情豈久存堪憐思女苦此意向誰論

橫橋病中自述

歸後反多病孤燈聽漏長擁衾愁夜永懸帳懼風涼簷
外桐鳴雨窗前樹有霜

窗外桐聲如雨

惟將不盡淚輾轉結悲

腸

右台工作將次告竣時值仲冬勢難久住山中心
又不忍捨之而去悲從中來夜不成寐窗外月明
實倍增惆悵強占七絕四首焚寄吾兒一覽

窗外清輝瀉冷光蟲吟階下斷人腸雁聲嘹唳雲中過
今夜傷心碧草堂

金爐裊裊起清香樹木凋零滿目傷無奈含悲歸去也

霜凝冰結別墳堂

臘入後一日前往墳堂作別擬東裝旋蘇度歲矣

青巒深處翠排松隱隱遙聽古寺鐘今日淒然別汝去
愁生情海與眉峰

蕭瑟秋風山景寒凋零膝下雁行單不如早棄凡閒境

塵夢焉如鶴夢安

長至夜思女

挑盡殘燈坐盡更一腔心事亂縱橫今宵徧野皆歡慶

惟我淒涼夢不成

亭秋館詩鈔卷二

大吉 欽 御 仲 冬 燦 爛 人 卦 山 中 心

亭秋館詩鈔卷三

錢塘許禧身仲葭

蘇臺集

悼周淑卿丁蓮漪兩夫人

攜來雙櫬作新墳，弔往追今暮色昏。西子湖邊埋玉骨，

南高峰下掩芳魂。兩夫人筱石前室也，迎來與女合葬於右台山。

再悼周淑卿夫人

標梅初過賦催妝，百輛車迎出畫堂。拜別雙親知敬戒，

從今艱苦爲誰嘗。其時筱石尙未出仕家計甚窘。

卻扇羞窺舉案郎，靜調琴瑟兩相莊。最憐共伴雞窗讀，

繡翦銀鍼翠袖揚貧賤糟糠雞窗伴讀親操井日之勞夫人皆任耳

再悼丁蓮漪夫人

靜處香閨十九年感將阿伯最垂憐雀屏代中乘龍壻

花燭雙輝玳瑁筵

時筱石贅姻於夫人之伯父丁文誠公督署中

堪歎于歸甫一年孟梁情重兩相牽求名不道催人促

從此分飛離恨天

春闈赴考筱石買棹北上夫人即病至春風報捷夫人證已增重不復再

見矣

夢中歸省

試問瑤臺第幾仙塵凡不戀占人先輕拋阿母歸真去

高閣瓊樓敞綺筵

山中和筱石韻

滿山紅日不生寒
身著重裘那覺單
君在蘇臺儂在浙

頻將寸紙報平安

筱石來函皆屬早回
蘇署恐山中太冷

書來錦字細丁甯
未可初冬學踏青
紙短情長言不盡

殘灰撥處火星星

傳來一紙報安甯
山閣生春萬木青
冬日夜長更漏永

愁看殘月照空庭

宵來坐對一燈青
頻禱君家睡夢甯
聊慰右台山內客

莫教長夜倚窗櫺

述懷

古云不仕一身輕欲罷還留戀此名目下霜花飛滿徑
盼歸又待聽春聲

干戈滿地漸紛紜朝事無憑不忍聞安得清瓶能濟世
乞將甘露浣塵氛

長夏憶女作

無端拋汝赴吳江終日凝眉倚碧窗清潔祠堂誰是伴
蛙歌蚓笛不成腔

汝父年華將白頭無聊心緒強相投通宵細雨絲絲落
身在吳江念越州

祀竈後一日馬醫科巷弔曲園老人回途次得詩

四截

臘鼓家家祀竈神
八旬春在不逢春
悠然含笑歸真去

古佛昇天棄世塵

是日立春

宦場心澹不爭名
萬卷牙籤了一生
留得文章千古在

孫曾繞膝繼家聲

早歲常存弟子心
愧難執業附儒林
今朝展拜靈幃側

仰望遺容感不禁

老人乃子姁之父子心實生敬而未師也幸幼時曾從姁課讀

萬木凋殘起暮雲
延生無術喪斯文
魂歸溫愛山前路

重聚泉臺德曜墳

墓門有溫愛世界四字

除日心緒無聊偶
檢舊藏茶甌忽得
清水一盞或

亦吾女有靈以甘露療余嗽疾耶將斯露徧飲在
座諸人及媪婢因成此詩

半百年華潦倒辰連朝送歲與迎新何來天外瑤池露
勉慰蕭條暮境人

除夕不寐

厭聞人語更囂囂臘盡光陰暮又朝爆竹通宵催歲去
夢魂顛倒浙江潮

元日出遇僕輩折巨枝梅花心殊可惜

旭日東昇轉綠蘋橫斜疎影膽瓶春愛他豔質欺寒雪
惜彼瓊葩落輒塵和靖種花名士態壽陽點額內妝新

拋殘未忍簪雙鬢賞到寒梅勝異珍

強展雙眉對綺筵寂寥心性拂雲箋正逢元旦清明日
難慰浮生暮境年幻影怱怱留夢轂悲腸鬱鬱付詩篇
驚回一枕黃梁熟免卻仙凡兩地懸

新正三日和筱石韻並懷女

歲去星回萬象新雙輪轉轉又逢春長空玉戲豐年兆

元旦後連

仙島筵開樂事親

除夕午後檢點舊藏茶甌轉瞬得清水一杯徧飲在

座諸親友

少厯人閒銷浩劫重歸河畔證前身思兒心是露

泥絮坐對寒窗黯出神

樓臺玉飾粉妝新萬戶歡聲動地春世上胸懷時落窳

夢中消息總難親
詎求佛國延生露
願棄人間不繫身
仰望雲山何縹緲
一腔幽恨對遺神

對梅懷女疊前韻

玉瓶疎影一枝新
豈讓羣芳占早春
久耐歲寒將雪傲
常依暖閣令人親
汲來清淨地中水
聊慰龍鍾世上身
綠黯紅愁兒不管
仙山雅集款諸神

滿山風景又更新
數點梅花報早春
故里遙憐雙女墓
仙居猶幸一家親
幾時得轉蓬萊路
何日重拋傀儡身
情短情長皆幻境
但將軀壳付傳神

春日和筱石韻

且隱吾鄉住苾蘿閒居山閣暫時過人情反覆船遭浪
世運循環馬轉坡爲國羨君懷抱永思兒愧我淚痕多
還睜睡眠權相候平盡風濤退盡波

自慚補屋試牽蘿霎眼光陰一瞬過宦態更翻風落葉
飢民如徙蟻盈坡聽來春雨繇繇落添得詩腸轉轉多
堪歎此心無所寄祇隨流水逐清波

和叔兄由贛寄詩原韻

兩袖清風政策良吳中化日正舒長棠陰處處留鴻爪
蘭玉森森列雁行因賦朝雲飛畫棟難拋故國念蒹鄉
料知客裏饒清興一曲瑤琴月下觴

仲春庭蘭又得並蒂花

澹泊胸懷名士襟結來清畹更同心香生雲閣雙肩鞞
韻繞蕉窗兩意沈淮浦名園曾發秀金閨春院又成陰
花仙何故偏多戲費我推敲獨自吟

懷女並和韻

髫年雁序竟雙飛若慰椿蔭每夢歸塵世重臨摩詰畫
庭闈再舞老萊衣憐余近日心情減望汝他年甘旨肥
一曲霓裳須罷奏閒階仰望暮雲稀

二月朔日 生母李太淑人及次女穎兒忌辰

寂靜閒階淚滿襟思親悲女總傷心春光何故嚴霜烈

長日偏多陰雨侵俯案執毫書貝葉對窗開卷誦蓮經
夕陽西下還思睡且向莊周夢裏尋

懷次女

猶憶嬰兒甫一周罡風底事便歸休清宵有夢還依膝
長晝無聊不醒眸挑盡青燈誰共語燒殘紅燭自增愁
雁行何日連翩至來奉慈闈跨鶴游

丁未春夜與筱石詠雪聯吟

預卜豐年兆

筱石

頻添韻事豪雪窗開睡眼

亭秋

鴻案

試吟毫柳絮漫空舞

筱石

梅花著色高謝庭悲道韞

亭

秋
梁苑感枚皋凍合留鴻爪

筱石

春融勝雨膏壓廬高

士卧筱石 埽徑小奚勞 爐點香烹茗亭秋 旗飄濁買醪

神通獅象戲筱石 冷傲竹松操 夜靜風聲烈亭秋 朝晴

鳥語嘈天公 貽畫本筱石 題句問仙曹亭秋

春光

春光明媚百花稠 鳥語聲聲嘯不休 忽見絲絲楊柳碧

煩他為我繫歸舟

昭慶寺為紋女營齋

十七年前汝降生 卻逢長至喜添嬰 從今佳節愁中過

梵院淒涼夢不成

詠別由蘇旋杭舟中作

梧桐庭院晚風涼
惜別無言聽漏長
同展含真飄淚點
彩毫飛處墨花香

微陰天氣布帆揚
兩岸輕風舞綠楊
雖有長條難絆客
一年幾度渡蓮塘

柔情如夢夢如煙
寂寞愁懷年復年
宿鳥歸林紅日落
一帆飛渡碧雲天

青山隱約白雲鄉
細雨敲窗篷背涼
碌碌紅塵何日定
雙借同志住錢塘

初夏由杭赴蘇河中水淺膠舟忽大雨如注始得
進行

天降甘霖瀑布揚陰雲四合影迷茫果然添足河中水
因渡輕舟出藕塘

舟中卽景懷女

碧塘雨灑浪花輕流水隨波慣送迎天外仙音空極目
長隄日影總牽情尖毫寫意無佳句濁酒澆愁有巨觥
夜靜扁舟風又疾一腔幽恨聽殘更

丁未六月朔值余五十初度連日歎已思兒覺毫

無樂處先於五月廿九夜萬籟無聲簷雨滴階時

已交子初忽見一深黃色有黑點彩蝶飛舞堂內

筱石卽起用扇延之歸室供於女靈前案上次日

則仍然伫立近午老媪供飯移扇飛至紗窗余入
視則又盤走作圓圈式或飛舞懷中作依戀態余
心稔知兒化身因默屬曰仙凡有別豈可久戀人
閒抑且反傷我意也聞聲卽飛至袖中依依不去
隨後移置院落餉以鮮荔又半時俄聞異香數陣
始見飄然飛入雲霄在座有筱石西齋七兄及黃
香仙娜兩姪女及女僕數人也作五律記之

蠟炬灰將盡紅窗隱楚蕉庭空悲絮影簾靜避塵囂帶
雨歸何晚乘風去轉遙彩衣飛舞處清淚濕鮫綃

蓮漏聲聲遠金爐寶篆消明霞分五色金縷聚千條繡

榻留餘迹清閨伴寂寥羽衣歸慰母雲路豈愁遙
玉露金風起飄然返畫堂詩書驚錯亂畫譜歎荒涼歸
學蒙莊幻難消護室傷飛翔臨繡戶介壽舞霓裳
待得天將曙晴光照綺寮仍然停舊室尙未返雲輶香
繞旌幢靜杯傾琥珀搖盤旋依膝下展翅入雲霄

盛夏由蘇旋杭舟中賦別

萬籟聲都靜長空月上弦整裝心黯澹作別意流連伏
案詩難就推衾夢不全惟將無盡語錦字寄纏緜

憶女

日落遙空靜瓊山暮靄沈長隄含翠色短笛和疎磻寄

語蓬萊客須憐塵世心忙中還作慰魂夢暫相尋

紋兒二周年在睦巷誦經三日有感

月缺花殘二載游白雲深處湧蓮舟觀來世路護闡苦
添得瑤池孺慕愁化蜨紙灰微雨灑生香絲帛夕陽留

廿二日微雨澹日異香不絕

浮生如夢看將醒腐草棲螢在陌頭

補錄南山祠堂作其夜月光如晝夢境迷離因此
記之

迷離幻境費疑猜一片青旗下玉臺裊裊餘香飛日影
飄飄幡蓋馭風來雲邊鶴輦仙音細山內鸞輿彩仗開
長夜清光如白晝悠揚雅奏出蓬萊

別蘇署小園

步盡長廊過短亭蕭疎秋色暮雲停
 天邊歸雁催紅葉池內游魚戲綠萍
 移竹復生寒倚袖分花又見錦成屏
 去秋之菊分種各盆今頗茂盛
 春初移竹日見萎頓又忽茁芽
 思賢香雪廳廳本名思賢四面皆有梅花
 四時佳境原堪戀難撇

留別

忽傳朝旨出西京蜀道崎嶇心黯驚
 風雨瀟瀟吹落葉那堪秋景助離情

和筱石蘇臺留別韻

小作句留且住吳擬賃屋暫住蘇郡
 故園咫尺未為孤南歸欣

羨投林鳥北去愁瞻蔽日鳥
八載宦情縈笠屐廿年鄉
夢寄菰蒲斜暉返照疎林境
隱約雲山入畫圖

相邀同玩浙江潮
落葉催人暮雨瀟
雁入長空鳴遠塞
舟行淺水渡虹橋
依稀青嶂朝聞磬
隱約紅閨夜弄簫
再譜驪歌心自感
一腔愁緒繫柔條

莽莽狼烽隱九州
風雲臺閣苦旁求
願君權作歸巢燕
弗羨飛鳴出水鷗
琴鶴一肩鄉路熟
煙螺萬疊客心愁
年來聚散渾無定
催動行旌又晚秋

前歲回南送女
振安葬時正仲秋
今

又至
其時

荻花楓葉早經霜
再聽鐘聲出景陽
野綠獨行窺雁陣

輓紅重踏聽鶯簧一航穩渡朝
金闕萬里長征返故鄉
柳色樓頭增別意夕陽鞭影兩怱忙

又和成一首

欲整歸裝又戀吳滿園落葉漸凋孤倚欄遙玩依花蜨
欹枕愁聽報曉烏兩岸月迎千樹柳片帆風送隔江蒲
更欣離得爭名地暫作偷閒菊隱圖

九月七日偕仙娜姪女並其女佩瑗佩珣在復繫

園卽景聯吟

未盡持螯興聯吟在季秋夕陽低雁影
亭秋 碎石漱泉

流佩瑗
雅集名園啟
佩珣 清談韻事留
仙娜 東籬花態

瘦佩瑗南國柳枝柔佩珣蜨繞芳叢豔亭秋蟲鳴小草

愁佩珣沿隄風細細亭秋隔院角悠悠亭秋疏樹寒煙

補佩瑗遙空薄靄浮佩珣霜楓含醉意亭秋蘿月朗吟

眸仙娜離緒催蘭橈佩瑗鄉心記畫樓蕉亭閨侶別桂

院晚香稠亭秋杯酒聯吳會仙娜蒲帆送客舟亭秋看

山期後約佩瑗重聚勝湖頭佩珣

旋杭期定俞佩瑗女士出詩贈別詞意悱惻余亦

勉和數章

一葉扁舟楚與吳兩年荏苒喜居蘇清談繡闥開珠箔

瀟灑胸懷朗玉壺晝寢凝香燃寶鴨蕤鄉有味戀銀鱸

閒來共慰重闈意春在堂前舞綵圖
英秀鴻才出鄭家拈詩鬪韻總清華吳邦幼失護堂草
越國常傾姊妹花梓里髫齡煩訓誨椿庭課讀教柔嘉

兩年聚首殊心折閨閣聞名眾口誇

蘇隄柳色漸經霜日落寒礎起暮涼滿紙煙雲留畫稿
數灣流水寄琴囊年餘聚首光陰速兩地牽愁別意長
三疊陽關情黯澹河梁一曲醉瓊漿

詩才雙鳳冠金閨每訪閨英赴錦堂雅集釵鈿忘入暮
分襟杯酒近重陽數枝移贈秋容澹尺幅欣吟妙句長
待得湖山花爛漫春來歸燕聚雕梁

留別仙娜姪女

憶昔垂髫嬉戲年，慈闈失恃總堪憐。
標梅迨吉開溫鏡，夫壻清才著祖鞭。
并曰親操重日愛，趨庭禮習阿姑賢。
階前蘭玉雙枝秀，膝下長傳課舊篇。

春花春草起嚴霜，雛燕分飛各一方。
百輛彩輿離繡閣，兩行花燭照新妝。
梁鴻共舉齊眉案，比翼雙鳴五世堂。
自有因風吟落絮，不須鸚鵡弄笙簧。

秋宵不寐與筱石話別聯句共成八韻

葉落西風靜挑燈，夜未央。
亭秋布衾難入夢，角枕頓生

涼。
筱石別意言無盡，離愁引更長。
亭秋瑟琴調雅奏，刀

尺辦嚴裝茂苑輕舟發吳山立馬忙

筱石

空庭悲柳絮

秋塚感糟糠一水朝

天闕層巖返故鄉

亭秋

勿忘借

老約鴻案永相莊

筱石

九月初六余將返杭率

子婦

并萸香仙娜兩姪女

至小園蕉亭話別菊圃聯吟殊難自遣偶聯七律

四首以誌別意

鉛華洗盡傍芳塘

白芙蓉

煙雨輕籠雅澹妝不與春花迎

旭日竟隨秋菊傲嚴霜長空雁影排雲陣深院禽聲送

晚涼正在無聊詩思少忽聞短笛度東牆

亭秋

天教細雨豔秋容

亭秋

倩影亭亭碧檻東

仙娜

團坐蕉

窗思詠絮

亭秋

聯吟菊圃感飄蓬

仙娜

紅欄曲曲蟲聲

碎

亭秋

綠樹深深畫意工

仙娜

作得詩成愁檢韻

亭秋

柔條難縮暫離衷

仙娜

涼風習習雨絲柔
小艇烏篷繫陌頭
老樹盤根原自古

長條縮客總難留
生成孤節沖霄志
不附繁花得意秋

檢點行裝心黯澹
無窮幽怨寄蘇州

亭秋

杯酒思賢

園內話別情

仙娜

堂名

輭風微雨溼簾旌

巽

梧桐

葉落秋聲老
金粟香添涼意生
絮語庭前愁判襪
清談

花下聽吹笙
寒蟲也助人詩興
悄伏玲瓏片石鳴

亭秋

九月初七微雨放晴
在復繫園與筱石偕
仙娜姪

女 伯婧子婦 卽景聯吟共成二十韻

復繫芳園靜長空秋氣清亭秋芭蕉經雨潤楊柳趁風

輕仙娜移節心難慰分枝願復生亭秋密移種後園半見枯

萎余願明春暢茂綠陰羣蜨戲古樹晚鴉鳴亭秋倚檻

湖亭啟仙娜臨流水閣平一庭縈別緒八郡挽行旌亭

秋筱石自放川督紳民均有留戀之意覓句攜茶具仙娜持螯愛酒槍嬌

雛悲詠絮新婦善調羹亭秋暫領蕪鱸味巽重來竹馬

迎兒童歌野曲父老動歡聲穫稻欣豐歲亭秋登高正

午晴龍山妨落帽緱嶺憶吹笙筱石前在汴夢紋女手持笙簫作古時男裝

傍沼芙蓉豔亭秋沿牆薜荔盈瓊葩和露植筱石怪石

似雲橫各盡聯吟興亭秋誰堪送遠情筱石小樓飛玉

笛亭秋大局等棋枰筱石若輔黃圖業定垂青史名仙

娜赤誠還向日亭秋素志勸歸耕地幸滄浪接筱石人

如畫錦榮仙娜推敲無限意聊以助離觥巽

分詠儒硯

片石端溪滑微凹聚墨多文場供點染壯志肯銷磨瓦
古遺銅雀書工換白鵝能酬詞客願濡筆幾吟哦

儒讀

夜永書燈靜宵寒詩思多雞窗勤苦讀螢案起悲歌才
子登金榜閨人盼綠蘿愁看雲路遠素志漫銷磨

吳江舟次聯句

十里旌旗寶帶橋 筱石 一行雁字入雲霄
扁舟載月波

光靜 亭秋 刻燭催詩漏點遙
紅葉滿山秋易老 筱石 綠

楊夾岸影全凋
明朝共訪西冷鶴 亭秋 戴笠看山合問

樵 筱石

出得吳鄉入越鄉 亭秋 唱隨檢韻鬪詩腸
青青客舍浥

朝雨 筱石 落落漁簷挂夕陽
幾處炊煙留畫稿 亭秋 一

帆風信送歸裝難忘謝女庭前詠 筱石
惆悵秋來穫稻

忙 亭秋 女生前有
秋來穫稻忙之句

一色空濛欲弄晴 筱石 角聲鳴處啟行旌
不堪卧轍攀

轅意

亭秋

孤負紅男綠女情十畝雲橫秋稼熟

筱石

三

篙水漲晚潮生更思今夜蕉亭景

亭秋

誰倚雕闌望月

明

筱石

暫脫朝衫著綠蓑

亭秋

湖西且聽采菱歌新栽梅竹都

成韻

筱石

舊夢鶯花許再過上界鐘聲聞遠寺

亭秋

南

高塔影入清波未能拋得杭州去

筱石

好景重將白句

哦

亭秋

人許如木許惟餘林欣去

秋景重秋白尚

如前... 昔... 情再... 上界... 湖... 寺... 塔... 幽

曾... 醉... 落... 綠... 長... 風... 雨... 且... 蟻... 亦... 驚... 蟻... 蜂... 林... 語

... ...

高水... 劍... 賦... 主... 夏... 思... 今... 文... 惠... 亭... 景... 亭... 州... 若... 倚... 欄... 闌... 望... 且

亭秋館詩鈔卷三

... ...

亭秋館詩鈔卷四

錢塘許禧身仲護

天香吟草

秋日湖船聯句詠別

載酒看山色

亭秋

句留爲此湖

筱石

風平秋浪靜

亭秋

心遠白雲俱

筱石

紅徧林閒葉

亭秋

青搖水面蒲

筱石

蕤羹鞭筍美

亭秋

何必四腮鱸

筱石

落日孤帆遠

筱石

平湖秋景長

亭秋

行旌將邁發

筱石

游興忽飛揚

亭秋

倒影三潭月

筱石

驚寒一夜霜

亭秋

竹深欲留客

筱石

臨別問歸裝

亭秋

一道垂虹影 亭秋 蘇隄閒白隄 筱石 疏鐘聞遠寺 亭秋

荒塚惜香泥 筱石 著屐來今雨 亭秋 捫碑訪舊題 筱石

未堪回首處 亭秋 鶴子與梅妻 筱石

助我吟秋興 筱石 長空天氣清 亭秋 雁橫雲樹遠 筱石

魚吐浪花輕 亭秋 野菊經霜瘦 筱石 芙蓉照水明 亭秋

柳絲難縮客 筱石 攀折總關情 亭秋

隔岸紅牆立 亭秋 南巡舊有宮 筱石 半肩樵擔月 亭

一角酒旗風 筱石 僧舍談餘劫 亭秋 漁舟悵轉蓬 筱

石 岳于雙少保 亭秋 憑弔聖湖中 筱石

暫撇塵囂訪舊情 亭秋 湖心垂柳漸零星 筱石 四圍山

色濃於染

亭秋

一片波光翠欲停

筱石

夕照寺前漁火

黯

亭秋

杏花村裏酒帘青

筱石

扁舟何處尋仙樂

亭秋

吸盡煙嵐未解醒

筱石

未作平原十日留

筱石

恩恩今又發杭州

亭秋

浮生總

被虛名誤

筱石

臨別翻增去後愁

亭秋

舊夢山中談射

虎

筱石

閒情江上寄盟鷗

亭秋

行經細雨斜風裏

筱石

華髮蕭疎易感秋

亭秋

輭紅重踏理輕裝

亭秋

更埽松楸返故鄉

筱石

鳳闕鐘

聲侵曉露

亭秋

鼇磯蓑影帶斜陽

筱石

遙知客舍挑燈

寂

亭秋

已累山妻寄柬忙

筱石

襟上酒痕儻追憶

亭秋

六橋煙月入詩囊 筱石

小艇衝波人兩三 筱石 白雲深處一茅菴 亭秋 昨朝踏

徧韜光徑 筱石 今日重游印月潭 亭秋 面面青山環郭

外 筱石 村村黃葉是江南 亭秋 何當再領西泠勝 筱石

早晚佳音報錦函 亭秋

漸放清明意 亭秋 登樓且看山 筱石 水雲鋪一色 亭秋

嵐翠溼雙鬟 筱石 隔樹聞樵唱 亭秋 侵階剔蘚斑 筱石

目窮孤嶼遠 亭秋 心與聖湖閒 筱石 但覺煙痕合 亭秋

翻疑日影慳 筱石 荒阡悲玉鏡 亭秋 再世慰金環 筱石

著屨香泥滑 亭秋 探囊舊句刪 筱石 獨憐華表鶴 亭秋

待客早知還

筱石

游過晴湖又雨湖

亭秋

江山勝景未全孤

筱石

螺鬟圍

繞煙嵐遠

亭秋

漁艇輕搖磔徑紆

筱石

冷落崇祠雙柱

老

亭秋

鬱盤佳氣萬松扶

筱石

流泉夜作游龍吼

亭秋

刻竹催詩補畫圖

筱石

和筱石原韻橫橋老屋作

霜結冰凝驛路長
馬蹏行徧舊村牆
松楸再整墳前景
一片歸鴉帶夕陽

仰望雲山問有無
日來心緒與人殊
殘燈挑盡風吹葉
秋雨敲窗點點麤

催動行旌上國游
別離滋味又深秋
樓頭殘柳添清淚
不羨乘風萬里侯

一肩琴鶴整裝齊
畫舫輕帆流水西
再看兩涯秋已老
短隄行徧又長隄

萬里無雲夜氣清
一鉤殘月照窗明
迴文顛倒情難盡
恍惚聞君夜讀聲

願得瓊漿酒一杯
蘭枝重復膝前栽
塵中渣滓當除盡
弄玉雙雙跨鶴來

湖山繞徧暮雲痕
俯視游魚戲水吞
舴艋小舟還帶酒

飄然飛渡數莊門

同泛扁舟至雲樂處又在劉莊唐莊高莊小坐

雙枝塔影對三潭日暮鐘聲出小菴風雨滿湖歸興促

北山行過抵山南

至三潭印月湖心亭遇雨催歸南山

畫槩雙揚曲水流染霜紅葉已深秋蒼煙四合看將暮

雁字橫空過舊樓

游俞樓

冷落 先皇舊幸宮宮花猶帶舊時紅梳妝臺閣分明

在寂寞廊前鸚鵡籠

止行宮

行沽仙樂暫飛楂茅舍疏籬過幾家覓得鮮魚難盡醉

將離祇恐各天涯

第二次止仙樂處覓魚沽酒

重行京國戀風雲世事艱難未可聞我願此身留故地

春秋常伴女兒墳

述懷寄筱石

烏嘯月下過樓頭臘夢驚回一縷愁燕國冰凝霜雪凜
越鄉風弄水雲浮青燈挑盡爐煙寂紅燭燒殘蠟淚流
可記西湖同泛棹夕陽影裏渡扁舟

祀竈日寫懷

聲聲爆竹敬廚神送舊迎新又遇春嗟我眼前蕭索甚
寒窗獨坐歎沈淪
聽盡寒更夢不成忽然心地放光明輕風吹得浮雲散
情短情長豈足評

飄飄瑞雪掩塵昏渣滓消除不見痕日出烽煙終滅盡

清光朗朗照乾坤

數點丹砂報早春
山中萬木總含新
縣縣不盡窗前雨
百感縈胸黯出神

寄筱石

肯謝朝簪得自由
浮名何必強羈留
列強洶洶窺中國
離緒紛紛繞故州
縈結千絲情不斷
迢遙萬里夢偏投
每夢或作別而醒還愁驛路難
通訊能否歸林早
善謀

筱石來詩和韻再疊寄

滿腔鬱恨挂心頭
添我新愁兼舊愁
寂寒更人語靜
瀟瀟簷漏雨聲浮
青燈卧對驚塵夢
紅葉題殘誤水流

搖曳垂楊春意轉一帆風順待歸舟

香爐巷裏屋西頭卻扇初逢未解愁夜色深長清露靜

時正仲秋月光皎潔彩雲浮羈留燕國春常永荏苒湖山歲

似流每到無聊難自遣燈花黯卜算歸舟

夜夢 先慈李太夫人先姊適廖氏夫人枕上口

占

宵來隱約奉 慈暉與姊相偕侍繡幃忽聽鄰雞驚夜

夢枕函淚迹爲兒揮

除夕述懷寄筱石

聲聲臘鼓祇催年畫閣生寒夢不全半爲思兒半懷遠

紛紛清淚溼雲箋

曲園遺集當嚴師費我連朝苦苦思每到深宵人語寂

冰花獨對結清池

堪憐入夢每魂驚醒後依稀喚女名牆外風聲催凍箭

嗽聲咳盡一更更

立春日感作

靜坐寒窗獨出神依稀玉笛度西鄰拈來鳳管傳心素
書就鸞箋慰遠人萬里青山還念舊一庭紅日又更新

杭城一雨十餘日
今日滿窗日影矣

飛仙何故音仍渺理罷晨妝黯苦辛

女亡已三年屢顯靈
迹惟仙容縹渺也

對梅懷女

數枝斜影伴更長
朵朵含春盡透芳
如雪冰姿孤潔態
成丹朱色豔新妝
臨風玉韻忘生倦
映日珠光黯送香
夢杳雲飛何處是
瓊山難覓舞霓裳
電捲霜飛每自憐
彩衣若再舞庭前
留仙何故歸雲速
顧影難教缺月圓
鏡匣書燈添我淚
藥爐茶竈了兒年
天公相逼罡風厲
玉蘂飄零墮翠鈿

右台山獨坐書懷

欲訪寒梅到嶺頭
恐因佳景動離愁
飛鳥陣陣鳴山閣

子雁雙雙過畫樓

右台婦墓意欲孤山一探
梅信又恐鉤動離愁而止

夕照鐘聲

聞遠寺雷峰塔影入清流暮雲片片催歸也風起雲迷

難久留

入暮風生
難以久坐

遠隔黔山驛路長恩恩歲轉又春光隄邊綠柳搓新縷

林內黃鶯理舊簧香屑兩行花吐豔清風數陣竹生涼

黯然獨坐聯吟處萬緒離情結寸腸

去歲仲秋與筱石於此聯吟

詠並蒂蘭

交柯並倚鬪新妝相對無言意自芳月下亭亭同照影

風前寂寂兩生香鉛華洗盡冰霜志清潔攜來雲水鄉

山島難尋高品格雙花歲歲聚蘭房

自壬寅年在清江漕署得並蒂蘭一

朶至今六載年年
必有今又得兩朶

五言詩金卷四
春
春花春卉發春辰
小草披香密密新
因合素懷開並萼
更欣雅韻出重垠
臨風共鬪雙鬟澹
對月還添兩意勻
是否仙山移世俗
霓裳奏罷再娛親

述近懷和筱石韻

挑盡殘燈倚盡窗
重遮錦幔護銀釭
弄簫怕奏同聲曲
望月愁觀渡口艫
伏案獨吟懷遠句
理妝默對女靈幢
廿年大夢而今覺
更見歸鴻列陣雙

彌陀數卷早營齋
待得妝成近已脾
蕭索詩情餘繡墨
無聊心興罷金釵
宦中况味難留目
故國風光總記懷
春轉皇恩和露降
輕舟暫發兩相偕

執得尖毫墨點濃加餐錦字手親封心如流水行還轉

意似遙山疊更重

頻年願早歸田而筱石尙留宦途以致鄉心愈摯

世事茫茫

知有盡飛仙渺渺覓無蹤何時驚醒紅塵夢獨坐窗前

心黯春

女亡後得心沖之病今更甚矣

西子湖邊戀舊廬思兒悲况總難除故園落落情無限

鄂路迢迢懼久居那羨飛鳴雙子燕堪欣掉尾半潭魚

滿藏金玉歸何用不若遺留萬卷書

雲山縹緲夢難尋病體悲懷轉轉深祇道鸞箋常詠別

不期鴻案再調琴蘭房又發雙生蕙

兩得並蒂蘭今年之春蘭也山

閣同鳴比翼禽碌碌塵途何日定宦中滋味苦相侵

瓊山何速促歸函未見雙飛竟棄凡零落香閨空繡榻

蕭條墓徑冷疎衫憶女風凝凍地催征馬筱石請假三月回黔掃墓正值

臘內春暖輕波轉錦帆待得公庭開綺閣萬民徧野頌

聲咸

懷古

舊章頻改換新條零落宮闈罷楚腰韓信淮陰甘辱胯

伍員吳市苦吹簫風催寒漏難成寐冰結長江不動潮

燈燄消殘無可遣權將鬱悶記生綃

春日游湖

櫓入清波聲自柔一航輕渡過瀛洲春風未必能吹醉

行徧長橋到酒樓

春日游湖與姪女仙娜子婦伯婧船中聯詠

曲折疎籬短短牆綠陰深處囀鶯簧萬山亂疊雲如絮

亭秋碧水平鋪鏡轉航仙娜垂柳生春明檻外小桃鬪

色豔隄旁岸邊有紅白桃花一枝隔離隱約黃花燦亭秋籬中有菜花臨

閣參差翠荇長仙娜揆盡枯腸吟小舫暫停餘墨訪高

莊亭秋煙凝遠近嵐光合風送低昂水調忙巽聞鄰舟絲竹聲

雙塔鈴聲搖日色六橋虹影映波光輕風澹澹游人散

一片歸鴉帶夕陽亭秋

戊申正月夢兒詠

繡帶金冠入夢來一堂團聚笑顏開雙眉微展仍依膝

再向庭前學老萊

夢少石大兄與筱石及予率紋兒團坐圓几醒後語家中人筱石可望調

鄂後果由川調回緣大兄久宦鄂也

追憶丁未冬至夢兒

玉面珠唇倚入懷含歡微語母歸來

夢兒卧榻上如初醒狀語曰母回矣

金風颯颯催紅燄夜雨瀟瀟點綠苔兩鬢漸增飛雪影

一篇吟盡落花哀場中傀儡看將醒難待蓬萊跨鶴回

感懷

蓬窗重倚望雲輶短笛疎砧惹寂寥寂寂沿隄桑意密

炎炎世態宦情驕但知鼓腹心中熱祇恐燃眉目下燒

笑我年來愚太甚，一肩愁擔爲人挑。

憶女

鸞飛鶴舞渺仙輶，長路悠悠夜沈寥。
仰望瓊山心自戀，俯觀塵世意偏驕。
扁舟帆影春波靜，茅屋霞明暮色燒。
日落雲輕將入夢，一腔幽悶倚窗挑。

篷窗感懷

長空雲靜隱仙輶，鎮日悲懷每自寥。
碧水輕波魚戲樂，綠陰老樹鳥鳴驕。
依稀篷背更聲碎，隱約疎林夜爨燒。
欲罷愁腸情不斷，滿腔詩債又重挑。

天中聯句有懷昌紋

鄂渚新移節端陽荷

聖慈

客臘直幅

上賞

御書慶壽
今日始到

桂樓堪遠望

筱石

蒲罽喜同持江靜輕雲澹

亭秋

天高

落照遲鶴歸聞玉笛

筱石

蜨舞戀花枝

日來翠蜨十餘飛繞桂樓前

猶憶牽牛夜

亭秋

兒在時每逢七夕佳節必約閨中女伴羅瓜果於庭乞巧

難忘繡

虎時

乙巳端午病中猶強起作繡虎

中流空繫纓

筱石

大局慨彈棋

兒

中談及時事輒鬱鬱不樂

禾稻生前詠

亭秋

兒幼時有秋來穫稻忙句

椿護夢裏

思多情青鳥信

筱石

雅韻彩鸞詞對鏡吾將醒

亭秋

焚

香汝定知日長無可遣

筱石

聊作憶兒詩

亭秋

戊申四月十六日到鄂署傍晚時忽見一蜨來如

手掌大盤旋於 祖先堂供女室數次飛去又月

杪時余正倚欄見二十餘蜨皆兩翼如點翠翼尖
吐金光閃爍轉舞桂樹梢頭後每日必來一時許距筱
石之生日祇三晨知預爲祝壽而來因此記之

兩翼平鋪金縷長盤旋飛處閃光芒冰綃霧縠輕霞繞
繡帶雲披翠羽揚介壽暫停天上曲承歡更捧膝前觴
仙風吹轉羅浮夢舞彩重臨十桂堂

松壽堂玩月有感

一輪江月照簾櫳似箭年華過眼恩國勢艱難民力竭
不堪中澤集哀鴻天意循環如可轉萬家安樂祝年豐
欣聞京洛降時雨桑林罷禱慰深宮願除新法政由

舊宏開棘院試生童軒靜雲開塵宇朗瘴清霧散月當
空歡聲徧野尊周孔萬家普及喜和風男善催耕女善
織春苗秋稻樂無窮不獨民生慰江漢並兼燕國與湖

東停車一一窺民俗老幼愚頑各不同怎若樓前翠衣

蜨其色如孔雀翎有知者言出於羅浮山每日必來或二十餘四月底至六月底去迎風飛舞

桂花叢昨夜電光天際落昨夜西北角有金光色今宵皓魄餘霞

烘幽賞倚欄桐樹下揆詩索句豁塵蒙舉頭對月生長

歎問天可有廣寒宮安得借爾嫦娥力煙消風定日長

紅

五月六日余偕筱石並子姪輩在桂樓攝影有念

吾女頗意含不歡越日展視影片於片中琉璃窗
格上忽見女容戚友傳觀羣相敬詫豈故示神通
將以慰老懷耶相對殊難排遣合賦此詩以諭知
者

幻來色色信非空

筱石

掩映朱顏隱鏡中樓閣玲瓏懸

寶月

亭秋

庭階馥郁有高風團圓親舍心聊慰

筱石

縹

緲仙容意不窮孺戀依依還繞膝

亭秋

何勞青鳥信常

通

筱石

瓊姿約略認難真

筱石

彷彿珠纓自在身斑綵庭中娛

二老

亭秋

瑤池會上第三人

事詳仙圖

生前蘭藥堪紉佩

筱

石 再世棠花晤轉輪 一片琉璃光不隔 亭秋 飛昇未忍

絕紅塵 筱石

秋夜與筱石聯吟

緣陰深處閃流螢 筱石 紅燭分光入畫屏 天上仙璫逢

蜨問 亭秋 樓中玉笛隔江聽 庭生寶樹風姿秀 室有幽

蘭夜氣馨 筱石 坐到良宵懷二女 好憑青鳥託雙星 亭

秋

懷女

仙凡一隔秋復春 色色空空夢內親 祇賸滿懷皆塊壘

庭前難覓絳霄神

一堂錦繡不生春
強作寒暄未必親
反覺此身多束縛
日長如歲伴遺神

每至無聊卽坐
女之小影傍

亭秋館詩鈔卷四

秋館詩鈔卷四